

01 AUG 1998

Djibouti-melawat

PRESIDEN DJIBOUTI MELAWAT MALAYSIA

KUALA LUMPUR, 1 Ogos (Bernama) -- Presiden Djibouti, Hassan Gouled Aptidon akan melakukan lawatan rasmi sembilan hari ke Malaysia mulai esok.

Lawatan itu yang bertujuan mengukuhkan hubungan kedua-dua negara dan atas jemputan Yang di-Pertuan Agong Tuanku Ja'afar dan kerajaan Malaysia, merupakan yang pertama oleh ketua negara Djibouti itu, menurut satu kenyataan Wisma Putra.

Hassan Gouled akan diiringi oleh Menteri Perdagangan dan Industri Djibouti, Mohamed Barkat Abdillah dan Menteri Pengangkutan dan Telekomunikasi Abdallah Abdillahi Miguil serta beberapa pegawai kanan kerajaan dan ahli perniagaan.

Beliau dijadual mengadap Tuanku Ja'afar dan Raja Permaisuri Agong Tuanku Najihah serta menghadiri taklimat di Universiti Islam Antarabangsa (UIA) dan Petronas.

Pemimpin Djibouti itu juga akan melawat Pelabuhan Klang, menara berkembar Petronas Kuala Lumpur City Centre (KLCC) dan Menara Kuala Lumpur.

Beliau juga akan mengetuai delegasi negaranya ke mesyuarat dengan Perdana Menteri Datuk Seri Dr Mahathir Mohamad yang akan membincangkan perkara-perkara kepentingan bersama, serantau dan isu antarabangsa.

Sementara itu menteri-menteri Djibouti itu akan menghadiri taklimat di Unit Perancang Ekonomi (EPU), Lembaga Kemajuan Perindustrian Malaysia (MIDA) dan Perbadanan Pembangunan Multimedia (MDC) selain melawat Institut Telekom, Cyberjaya dan Perbadanan Kemajuan Ekonomi Selangor di Shah Alam.

Djibouti, bekas tanah jajahan Perancis, terletak di rantau yang dikenali sebagai Tanduk Afrika dan berjiran dengan Somalia di selatan, Habsyah di barat dan Eritrea di utara.

Dengan keluasan kira-kira 22,000 km persegi, negara itu mempunyai penduduk kira-kira 434,000 orang dan ekonominya bergantung kepada aktiviti perkhidmatan.

-- BERNAMA

AFY oba